

DECLARATION

DV ROY, PAR LAQUELLE
il defend à ses subjects de la Religion
pretendue reformée de s'assembler, &
à tous Gouverneurs, Lieutenans, Maires
& Escheuins des Villes de son Royaume,
de les recevoir & admettre, Declarant
criminels de leze Majesté tous ceux qui
y contreviendront.

Verifiée en Parlement, le 14. No-
vembre 1620.



A PARIS,
Par FED. MOREL, & P. METTAYER,
Imprimeurs ordinaires du Roy.

M. DCXX.

Avec Privilege de sa Maieité.

NOTES

Case 1000

F

39

326

1620 frsd

THE NEWBERRY
LIBRARY



LOUIS par
la grace de
Dieu Roy de
France & de
Nauarre, A
tous ceux qui ces presentes
lettres verront, Salut. En-
cores que depuis six mois
en ça Nous ayons esté con-
tinuellement occupez pour
restablir nostre auctorité,
& pacifier les troubles qui
s'estoient formez en nostre
Royaume, y ayāt employé

A ij

& porté nos armes & nostre propre personne: Nous n'auons pourtant delaisié pour plus fortement establir la Paix & le repos dans nostre Royaume, de travailler soigneusement à faire effectuer & accomplir les choses que nous auions faiet esperer à nos subjects de la Religion pretendue reformée, lors qu'ils se separerent de l'assemblée qu'ils tenoient par nostre permission en nostre ville de Loudun, entre lesquelles la principale instance qu'ils nous

faisoient estant pour la remise de la Ville & Chasteau de Leictoure entre les mains d'un qui feist profession de ladite Religion. Et scachant les difficultez qui se rencontroient de retirer ceste place des mains du sieur de Fontrailles, Nous nous sommes portez en ceste nostre Prouince de Guyenne expres pour cet effect, & y auons apporté vn tel soing, qu'il l'a remise en nos mains, & en auons fait pourueoir le sieur de Blainuille, Gentilhomme,

A iij

faisant profession de ladite Religion : Comme aussi nous auons pourueu aux autres articles dont ils nous ont plus particulièrement & expressement requis. Et lors que nous estimions retirer d'eux le gré & l'obeissance qu'ils nous doiuent : nous auons esté aduertis que ceux de ladite Religion prétendue reformée ont conuoqué vne assemblée de deputez de toutes les Prouinces de ce Royaume en nostre ville de la Rochelle, supposans contre toute ve-

rité pour abuser ceux d'en-
tre eux qui sont portez à
leur deuoir, que lors qu'ils
se separerent de celle de
Loudun, Nous leur auions
përmis de se pouuoir r'as-
sembler quelques mois a-
pres: Ce qui nous a donné
sujet d'escrire aux Maire,
Pairs, Escheuins & Bour-
geois de nostredite ville de
la Rochelle, pour leur faire
defenses de receuoir en la-
dite Ville ladite assemblée;
A quoy au lieu d'obeyr, ils
nous ont assez faict cognoi-
stre par leur responce, l'in-

tention qu'ils auoient de la
receuoir en ladite Ville: Ce
qui est tellement preiudi-
ciable à nostre auctorité, au
repos public, & à ce qui est
du bien de nostre seruice,
que nous ne le pouuons dis-
simuler. Et à fin que chacun
sçache nostre intétion pour
ce regard, Nous de l'aduis
des Princes, Ducs, Pairs, Of-
ficiers de nostre Couronne,
& principaux de nostre
Conseil, Auons déclaré &
declarons par ces presentes,
l'assemblée que nos subjets
de ladite Religion preten-
due

due reformée ont conuo-
 quée en nostredite ville de
 la Rochelle, estre illicite &
 defendue par nos Edicts &
 Declarations, & contre no-
 stre volonté: Et cōme telle
 auōs defendu & defendons
 par cesdites presētes ausdits
 Maire, Escheuins, Pairs &
 Bourgeois de nostredite vil-
 le de la Rochelle de la rece-
 uoir, permettre n'y admet-
 tre en ladite ville, sur peine
 d'en estre responsables en
 leurs propres & priuez nōs,
 Comme aussi nous defen-
 dons à tous Gouverneurs

Lieutenans, Maires, Consuls, Escheuins, principaux Officiers, & Magistrats de nos autres villes, de receuoir, souffrir n'y admettre en icelles ladicte assemblée, ny toutes autres qui seront cōuoquées contre la teneur de nos Edicts & Ordonnances, & sans nostre expresse permission, Et à tous nos subjects de quelque qualité qu'ils soient d'y aller n'y s'y trouuer pour quelque cause, occasiō, ou pretexte que ce soit: Declarant ceux qui contreuendront à ceste no,

stre volonté, refractaires à
nosdits Edicts, desobeissans,
perturbateurs du repos pu-
blic, & criminels de leze
Majesté, Et en ceste quali-
té décheuz du benefice de
nosdits Edicts, & des graces
qui leur ont esté eoncedées
par iceux : mesmes du ren-
uoy qu'ils pourroient pre-
tendre en nos Chambres de
l'Edict. Voulons & nous
plaist qu'il soit procedé cō-
tre tous ceux qui se trouue-
ront esdites assemblées, &
contre les Maires, Consuls,
Escheuins & Bourgeois des

viles où elles se tiendront,
& les Gouverneurs, & nos
principaux Officiers d'icel-
les, selon la rigueur de nos
Loix & Ordonnances, tant
par nos Iuges ordinaires,
que par nos Cours de Parle-
ment: Ce que nous enioi-
gnons à tous nosdits Iuges
& Officiers, & à nos Pro-
cureurs Generaux, & leurs
Substituts d'y tenir soigneu-
sement la main, selon le deu
de leurs charges. Si dōnons
en mandement à nos amez
& feaux Conseillers, les gēs
tenans nos Cours de Parle-

ment, Baillifs, Seneschaux,
 Preuosts, Iuges, & leurs
 Lieutenans, & à tous nos
 autres Iusticiers & Officiers
 qu'il appartiendra, Que ces
 presentes ils facent lire, pu-
 blier & enregistrer chacun
 endroit soy, & le contenu
 en icelles garder & obseruer
 selon leur forme & teneur.
 Car tel est nostre plaisir; En
 tesmoin dequoy nous y a-
 uons fait mettre nostre scel.
 Donné à Grenade, le vingt-
 deuxiesme iour d'Octobre,
 l'an de grace mil six cens
 vingt. Et de nostre regne le

vnziesme, Signé, LOVIS.
Et sur le reply, Par le Roy,
PHELIPPEAUX.

Et scellée du grand seau de
cire iaulne.

Et sur ledit reply est enco-
res escrit,

*Registrees, oy, & ce requerant le Pro-
cureur general du Roy, pour estre gardées,
observées & executées selon leur forme &
teneur. A ceste fin ordonne qu'elles seront
enuoyées aux Bailliages & Seneschauffées
pour y estre publiées & registrées à la di-
ligence des Substituts du Procureur ge-
neral du Roy. A Paris en Parlement, le
quatorziesme Novembre, mil six cens
vingt.*

Signé,

VOYSIN,



